



Konferensia Imprensa Ba Serimónia Lansamentu e-Request

Autoridade Tributária Timor-Leste (ATTL) husi Ministériu Finansas dala ida tan marka momentu históriku hodi lansa **e-Request** ne'ebé hola parte iha plataforma ba **e-Services**.

*“nu'udar Vice-Ministra Finansas, ne'e hanesan previléziu ida mai hau tamba lansamentu **Certidão de Dívidas (CD)** online liu husi **e-Request** hanesan passu markante ida iha âmbito **Programa Reforma** maka **Autoridade Tributária (AT)** alkansa iha sira nia esforsu atu kaer rasik **Reforma** hodi kontinua halo melloramentu ba prestasaun servisu **AT** nian. Hanesan ita hotu akompaña, **Programa Reforma Fiskál** hahu husi kedas iha **VI Gov.** no transformasaun ne'ebé konsegue alkansa iha tempu ne'ebá maka mudansa **Estatuto Diresaun Jerál Impostu no Diresaun Jerál Alfandega** eleva ba **Autoridade Tributária no Autotidade Aduaneira**”* hateten Vice-Ministra Finansas Sra. Sara Lobo Brites iha loron 10 jullu 2020 iha auditóriu MF.

S.E. Sra. Vice-Ministra mos akresenta liu-tan katak *“nesesidade hodi halo **Reforma** ba **Diresaun rua** ne'e tambá ita-nia reseita husi riku-soin minaria sei la dura no sei esgota iha tempu balun, ne'e duni, reseita ne'ebé bele resiliente hodi kontinua iha sustentabilidade fiskál ba futuro mak reseita domestika, ne'ebé **Estadu tau fiar** ba **Autoridade Tributária** hodi jere administrasaun no koleasaun”*.

Iha âmbito **Reforma** no liga ba prestasaun serbisu no dezempeñu **AT**, Sra. Vice-Ministra Finansas informa mós katak *“**reforma** sira ne'ebé implemeta la'ós meramente atu fo kbi'it deit ba **AT** wainhira hala'o sira nia knaar ka goza estatutu **Autonomia Administrativa no Finanseira**, maibé iha objektivu prinsipál liu maka oinsa **AT** bele sai instituisaun ida ne'ebé **KREDIVEL** katak hetan **FIAR** no **RESPEITU** hosi sidadaun hotu-hotu, liu-liu kontribuente sira. **AT** presisa sai instituisaun ho **REPUTASAUN DIAK**, presiza hadia prestasaun servisu hodi bele hakbesik liu tan atedimentu ba kliente ho forma efisiente no efikásia wainhira hala'o knar hodi rekolla impostu ba **Estadu**”*.

Durante serimónia lansamentu **e-Request**, Diretora Jerál **Autoridade Tributária**, Mônica Rangel da Cruz, informa katak *“lansamentu **e-Request** ne'e marka tan pasu bo'ot ida ne'ebé alkansadu husi **ATTL**, ne'ebé esencialmente atu ajuda no auxilia ita nia kontribuente liu-liu: (i), evita aboresimentu administrativu ne'ebé la nesésariu sira no (ii), minimiza kustu ba konformidade ne'ebé bele fo sufrimentu ba kontribuente sira. Ho **e-Request**, kontribuente sira la nesésariu mai apresenta fízikamente iha edifísiu **ATTL** nian hodi hato'o pedídu ba emisaun **Certidão de Dívidas**. Sira bele hato'o pedídu husi fatin ne'ebé deit, tempu no momento ne'ebé deit, wainhira sira bele liga ba redi internet”*.

Diretora Jerál mos hatutan tan katak wainhira kontribuente sira rekere ba **Certidão de Dívidas**, kontribuente sira hotu sei simu alerta automatiku ne'ebé jere husi sistema hodi informa katak sira nia solisitasaun sei reveé hela. Sei karik la hetan kestaun/pergunta pendente ruma ne'ebé rejista iha **SIGTAS** no wainhira buat hotu kumpri ona tuir lei, kontribuente sira bele kedas hetan sira nia **Certidão de Dívidas** iha loron ida ka rua nia laran.

E-Request ne'e hola parte ba iha plataforma **e-Services**, ne'ebé lansa ona oficialmente iha loron 4 outubru 2019 husi S.E. Sra. Vice Ministra Finansas no **Diresaun Jerál Autoridade Tributária (DJAT)**. Desde lansamentu, **E-Services** iha tinan kotuk, plataforma ida ne'e benefisia kontribuente sira besik 2000, iha ne'ebé realiza ona **e-Filing** no **e-Reporting**. **ATTL** husi Ministériu Finansas planu hela hodi kontinua dezenvolve liu-tán plataforma **e-Services**, nune'e intrudúz **e-Payment** iha futuro.

#remata